



*Jumat, 11 September 2020*

**Ogen: Ende-enden Salomo 2:3-7**



**KAMI SANGANA SINGENAN**



**K**eluarga eme benteng si enteguh i bas mpertahanken jabu emaka perlu kal tetap lit hubungan entah pe relasi si mehuli antara perbulangen ras ndehara. Erkiteken kesibuken i bas pendahin, bagepe ngelitken erta kinibayaken mawen-mawen enggo kurang kal waktunta guna mbagun komunikasi ras hubungenta ras pasangenta.

I bas buku Pdt. Julianto Simanjuntak : merawat perkawinan, jelas ikataken i je maka perjabunta eme hubungenta ras pasangenta desken kalak ku juma, perlu kal irawat, ipupuki alu cinta, ibersihkan alu mbabat kerina kemarahan, emosi ras api cemburu si erlebihen. Ipupuki ka alu mereken waktu man pasangenta, tawa ras canda bagepe nuriken isi pusuhta man pasangenta gelah banci hubungenta e reh romantisna. Banci saja enggo pe kita ndekah erjabu, tapi penandaita nandangi pasangenta langa bo pas kal. Perlu mpebagesi penandaita gelahna kiniersadanta tuhu-tuhu paguh. Ngasup ngaloken sada ras sidebanna bagi paksa kita erteman teman denga mbarena sitedehen katawari pe ras pasangenta. Emaka dikune lit si la bagi ukurta pe la si pebelin, kerina e jadi tambah ngena ateta.

I bas ende-enden Salomo 2 enda ibabai kita ngegejapken maka pasangenta e desken buah apel i tengeh kerangen, melala pe buah apel sideban tapi pasangenta e ngenca si akap si entebuna, meriah ukurta cilinggem i teruhna tetap lit kesempatan guna mpegegehi pasangenna i bas kekurangan seh maka tetap lit waktu guna pasangenta i bas perjabunta. La kita murah tergoda rayuan kalak sideban subuk erkiteken kita mejile, lit kalak si mereken duit si menggiurken man banta, ngasup kita ngataken lang erkiteken pasangenta e ateta si jadina segedang geluh ras perjabunta.